

E siman deportivo mas dushi di Aruba "ASU WEEK"

Den conversacion cu un deportista veterano, mi a haya sa cu **ASU** lo ta preparando un **ASU WEEK** gigantesco e aña aki, pa celebra 65 aña di existencia di **ASU**.

E cos aki a ponemi pensa riba e bon dlanan, simannan y añanan di deporte cu nos isla a conoce y pensa riba deportistanan grandi di nos isla, mayoria di nan lubida.

Lubida, pasobra nos ultimo generacionnan no ta ser corda riba e personahenan aki.

ASU mes a wordo funda 65 aña pasa, pero e **ASU WEEK** a bini despues di tanto aña.

Prome cu esey tabata tin e competencianan anual den Lago Sport Park, cu tabata for di 1941 caba y ta despues di casi 20 aña e **ASU WEEK** a haci su entrada, manera nos a conoce.

Mi memoria cu hopi nostalgia, ta tirami riba algun di e presidentnan grandi cu mi ta corda ainda di **ASU**, manera **Dolfi Arends**, pa varios aña y cu tabata fundador.

Mi ta corda **Isaac Franka** cu tambe tabata un di e presidentnan grandi di **ASU** pa varios periodo y tambe **Oscar Henriquez**.

Mi no por lubida **Carlos Bislip** cu tambe a dirigi **ASU** hopi aña cu man fuerte, y di kende mi tabata miembro di directiva y secretario.

Tambe **Dolfi Oduber**, **Jo Wauben** y **Tico Kuiperi**, **Jose Wever** conoci como "**Buchi Panama**", **Boy Jonkhout**, y **Oscar Wernet** pa menciona algun cu a caba di pasa den mi memoria.

E personahenan aki a traha cu deportistanan grandi di nos isla y hopi di esakinan cu a logra titulo tambe di **Deportista di Aña**.

Un di esnan grandi di Aruba tabata **Pemberton**.

Si mi no ta quiboca, **Julian Pemberton**.

Nos tabata tin e atleta **Ricky Vorst**, tambe e all arounder di mas grandi, **Jani Brokke**, e futbolista **Mundo Kemp**, e basketbolista y tambe un all arounder **Mario "Joy" Bergen**, e atleta grandi **Herman Hope**, e futbolista **Juchi Jansen**, e basebolista y campeon di ping pong **Emiliano Jansen**, y e campeon di ping pong di mas aña cu titulo, **Mario Croes Jr.**

Den ciclismo mi ta corda **Pio Coffie**, den baseball como pitcher **Sam Jacobs** y un cu no a logra e titulo nunca pero cu hopi a lubida, ta **Franky Franca**, un hisador di peso cu tabata hisa dos biaha su peso di curpa.

Un persona di apenas 4 pia y algo di altura, pero grandi den fuerza.

Pa casualidad ta net su yiu homber awe ta president di **ASU**. Si bay bek mi ta corda con tur aña henter e isla tabata den expectativa grandi di kende lo bira **Reina di Deporte**.

Pa wordo eligi **Reina di Deporte** e tempo ey tabata mes importante cu e candidata a wordo eligi como **Miss Aruba of Reina di Carnaval**.

E **Reina di deporte** tabata wordo respeta y admira durante y despues di su periodo como **Reina di Deporte**.

Na tur evento deportivo tanto local como interinsular of internacional, e tabata presente.

Un tempo conocimiento deportivo tabata conta hopi y despues beyeza por a hunga un rol.

Nan tabata hopi **Reina di Deporte**, y di nan mi por corda ainda por ehemplo **Nilda Croes** cu semper a keda e **Reina di Deporte** cerca mi, tambe **Mercedes Oduber** cu tabata masha activo den varios ramo di deporte, **Filomena Diaz**, **Jane Lampkin**, **Edith Martinez**, cu ta esnan cu na e momento aki ta drenta e cerebro zwak cu mi tin.

ASU WEEK cu tabata un siman di deporte caminda cada persona tabata busca diariamente pa sa con desaroyo di e deportenan hunga a bay.

Den casi tur ramo di deporte tabata tin competencia y henter e isla tabata sigui esaki como si fuera ta un **Olimpiada di Comité Olimpico Internacional**.

E evento hasta tabata ser yama **ASU OLYMPIAD, of OLIMPIADA DI ASU**.

E olimpiada di **ASU** caminda emisoranan radial tabata transmiti e deportenan "**en vivo**" y bo por a sigui henter dia desaroyo di eventonan y haya sa di resultadonan.

Awe sigur hopi hende cu lesa esaki lo bisa, "**Juby a lubida tal deportista, tal presidente, y tal reina di deporte.**"

Esey ta bon, pasobra asina hende ta cuminsa pensa bek riba e periodo dushi di pasado y di e siman mas dushi di deporte na Aruba, cual mester wordo rebiba.

Awe hopi lo papia sigur riba nan idolonan di ayera, y tambe conta nan yiunan of nietonan kendenan tabata e **GRANDINAN** di Aruba, no solamente como **Deportista di Aña di ASU**, pero fuera di esey, papia riba e otro deportistanan y cada deportista grandi, y nan ramo di deporte.

Papia di kico nan a haci tanto localmente como internacionalmente.

Mi no a confirma cu e **ASU WEEK** ta bolbe, pero di e persona cu a papia cu mi y cu lo mester ta na altura di un ke otro, mi no ta duda cu e siman ta bini atrobe pa nos tur haci e grandi manera e tabata den pasado.

Juby Naar.